



Akileraarusersuinikkut iliuutsit aqputigalugit Nunatsinni inuit aningaasatigut pissakinnerusut atugaasa, tamatumani anaanaasut ataataasullu kisimiittut arlariinnik meeraqartitertut oqilisaassiffigineqarsinnaanerit pillugu apeqquteqaat aallaavigalugu oqallisissiaq.

(Inatsisartunut ilaasortaq Aqqaluaq B. Egede, Inuit Ataqtigiit)

Uggornalaarpoq Inatsisartunut ilaasortaq Aqqaluaq B. Egedep, Inuit Ataqtigiit, manna siunnersuut saqqummiummagu eqqarsaatigeqqaallannguarnagu nammineq partiiniluunniit ajornartorsiut pillugu sussanerlutik. Siunnersuummut tunngavilersuummi taamaallaat eqqartorneqarpoq ullumikkut pissutsit, oqaatigineqarani siunnersuuteqartoq suniarnersoq.

Immaqa pissutaaginnarpoq, akissutip imaannaangitsuunera?

Eqqortormi tassaavoq uangut inuiaqatigiittut pissaaleqisut ikiorniarlugit annertuunik iliuuseqareeratta. Taakku qitornaat akeqanngitsumik meeqqerivinniittarput, ineqarnermut tapiissut atuuppoq, meeqqanut tapiisuteqarpoq. Taavakka oqaatigilaaginnarniarlugu maani inuiaqatigiinni pissakilliortut imminiiginnarneq ajorigut.

Kisianni taamaakkaluartoq inoqarpoq akissarsiakitsunik taamaattumillu ulluinnarni inuuniarnermini artorsartunik.

Taamaattumiguna Demokraatini arlaleriaqaluta oqaatigisaripput sulisartunut ilanngaat atuutitertariaqartoq. Sulinermit ilanngaat atulerpat, akissarsiakinnerit akissarsiamik ilaat amerlanerit tigusalissavaat. Demokraatini isumaqarpugut tamanna naapertuuttuliornerusoq.

Tamatuma saniatigut pingaaruteqarpoq taassallugu ilinniartitaaneq sammiuartariaqaripput. Ilinniarneq akissarsiarissaarluni sulilernissamut aqputissat ajornannginnersaraat aamma tamanna eqqarsaatigillaqqunarpoq ilinniagassamik toqqaalernermi.

Tassaapput oqallinnermut Demokraatini ilanngukkusutagut.